


NKUNA KE KABULA

VE DIFWA NA MPUSU

 Matondo mingi na nge, Mpangi Demos. Mpe ntangu yayi beto ke na kiese na kuvwanda awa na suka yayi, mpe kuwa bimbangi yayi nionso ya bantu yayi ya mbote. Mpe ntangu yayi, beto ke na kivuvu ti Nzambi ke vwanda na beto mpe ke sakumuna beto.

² Ntangu yayi, na nkokila yayi, mu me bakula ti mu ke tuba na nkokila yayi, kana Mfumu zola. Mpe mu lombaka Mpangi Shakarian, na mwa ntangu fioti me luta, mu tubaka, “Ntangu yayi, kutula nsoni ve. Mu zaba ti beto fwana basika awa na ngunga kumi na mosi mpe mu—mu ke zimbisa mabanza ya ntangu nionso mu ke mata awa.”

³ Ya ke talana mutindu beto nyonso ke sala. Beto ke kuwa . . . Ba ke tuba, “Baminuti zole, baminuti tatu, to . . .” Mpangi Smith, nge zaba, ya kele mpasi na kusala na baminuti zole to tatu. Mpe mu zaba mutindu ya kele, mpe mu ke talaka kyadi na mosi na mosi. Kasi beto kele na kati ya nsungi ya ntangu, kisika beto kele. Beto ke kwenda na Seko, kasi beto kele ntangu yayi na kati ya ntangu.

⁴ Mpe mu tubaka, “Mpangi Demos, mwa fioti kaka na ntwala ya ntangu, kuvwanda ve na nsoni, benda munu kaka na nsongi ya kazaka mpe mu ke zaba ti ya kele ntangu ya kusukisa.” Ntangu yayi, kana mu manisa ve, mu ke manisa na nkokila yayi. Na yawu kana mu sala yawu, mbote, mu ke kuzwa dilongi ya malu-malu na nkokila yayi.

⁵ Ntangu yayi kaka ntete beto zibula Buku, beto tuba na Nsoniki, na bayintu ya beto ya kukulumusa.

⁶ Tata ya Mazulu ya luzolo, beto ke tonda Nge na suka yayi samu na kuvukana yayi, samu na yina beto me kuwa yawu dezia. Kana beto lendaka bika diambu ya luvunu na ntangu yayi, Mfumu, beto ke na nsatu ti ya vwandaka mbote yawu kuvwanda awa. Na yina mu ke sambila ti Nge ke landila, kana ya kele mbote na meso ya Nge, mpe landila na kuvwanda na beto mpe kusadisa beto. Mpe ntangu yayi beto me vukana beto mosi pene-pene ya Ndinga. Mutindu beto me vukana pene-pene ya kimpangi ya mosi na yankaka, na kuwa bimbangi ya yina Nge me sala samu na beto, ntangu yayi beto vutuka na Ndinga mpe beto tala kisika nionso yayi me katuka. Na yina, yina ke vwanda kusiamisama ya yina beto ke kuwa mpe ke mona, ke salama bubu yayi. Pesa bima yayi na Nkumbu ya Yesu Klisto. Amen.

7 Ntangu yayi, mutindu—mutindu kisadi ya Yandi, mu—mu me tumama na ngolo na Nsangu. Mpe ba ke bakulaka munu mingi na mutindu ya yimbi, na bantangu me luta, mpe mu banza ti ba ke sala yawu ntangu nionso. Kasi mu ke tuba ve mambu na bantangu yankaka samu na kuvwanda—samu na kuvwanda ya kuswaswana, mu ke tuba yawu samu na kuvwanda ya kusungama. Mpe mu zola kutuba yina mu banza kele ya mbote. Muntu nyonso kele na muswa ya bima yina, samu na kutuba dibanza ya yandi mosi. Ya kele samu na yina mu kele na kati-kati ya beno.

8 Mpe Mpangi Shakarian, ke tuba na yina me tadila bakalati ya bisambu na bandonga ya bisambu, na kumonaka yina Mpeve-Santu. . . Ntangu yayi, yandi tubaka yawu ve samu na munu. Yina ke samu na Mpeve-Santu, samu mu lenda sala mambu yina ve. Muntu nyonso zaba, ti mu lenda ve kusala yawu. Kasi—kasi ya kele lweka ya fyoti, yina beno ke mona awa. Beno fwana vwanda na kisika yankaka, mpe beno tala mutindu Yandi ke zonzaka mambu na ntuala! Mpe mu. . . bima yina ke salama, ya kele, yayi kele kaka. . . beno, beno kele yandi yina ke salaka yawu. Beno kele yandi yina ke kwikilaka na Nzambi.

9 Mpe—mpe kana beno ke kwikila ve na Nzambi, beno bambuka moyo, Yandi ke tuba na beno mambu mingi, kaka awa na estrade. Mpe kana beno kele na kati ya disumu, Yandi ke tuba na beno mutindu yina. Mpe bima yina beno me sala, kasi beno zolaka sala ve, Yandi me tuba na beno mutindu yina. Yawu kele kaka ve yina bawu ke tulaka na kalati ya bisambu. Bawu lenda tula na kalati ya bisambu ya bawu. . . Bawu zolaka tuba ve, na zulu kuna, bawu vwandaka “nsumuki,” mpe kento yayi vwandaka “zinga na bakala ya yandi ve,” to nyonso yina. Mpe bawu ke tula yawu ve na kalati ya bisambu, kasi Mpeve-Santu ke simba yawu na mutindu nionso, beno me mona. Beno me mona? Mpe na yawu ya kele. . . kuna na mutindu. . . kitini ya kimpeve, bankundi.

10 Mpe mu ke tuba yayi na luzitu nionso, samu ti ya kele ve na mingi ya beto awa na suka yayi, kaka nkonga ya fyoti. Ya ke yitukisa munu, tii kuna ya ke kotisa munu mingi na kati ya kidi-kidi, mu ke zolaka kaka kuboka na bantangu yankaka. Mpe ntangu mu ke vwandaka na kisika mosi, na lweka ya mongo, kisika mu ke lutisa ntangu ya nene kuna, mu ke kuzwa na Nzambi, mu ke kulumuka mpe mu ke pesa na bantu yina Yandi pesaka munu. Mpe mu—mu zola vwanda ya kuswaswana ve na bantu. Kasi ntete, kuvwanda ya kusungama, mu fwana vwanda ya kusungama na Nzambi, beno me mona, samu na—na Nsangu.

11 Mpe ntangu yayi beto kele, kana Mfumu zola, beto ke zola kwenda ntama samu na kuzieta na bayinsi ya nzenza, kaka na mwa bilumbu, mpe kana ya kele luzolo ya Mfumu. Kieleka mu ke lomba bisambu ya beno.

¹² Beno kele mbote mingi! Mu ke kota na kuzonza, mu ke zimbana kaka ntangu nyonso, mutindu bayankaka ya beto. Kasi na Mpangi Shakarian, balongi yayi ya mbote awa na estrade, mpe kuna, beno nionso bankundi ya Yesu Klisto, Mu ke pesaka beno mbote na Nkumbu ya Yandi; mutindu mpangi na beno, na nzila ya kulunsi, na Nzambi, na kuvwandaka bampangi-babakala mpe bampangi-bakento.

¹³ Mu zola kubaka, na suka yayi, na Masonuku, kuna na Buku ya Galates, kana Mfumu zola. Mu zola kutanga Masonuku.

¹⁴ Ntangu yayi, mazono na nkokila, kuwa nsangu yina me basika awa na mpangi ya beto ya bakala yayi ya ministere awa na estrade, yandi tubaka na bandinga ya malu-malu. Bredesen, Mpangi Bredesen, bakala mosi ya mbote mingi. Munu . . .

¹⁵ Kumona yayi na kukondwa kutanga mpe kulonguka, kukondwa bakula ya munu ya bampova, mpe na yina na kuzabaka ti Nsangu kele kieleka, mpe kumona babakala yayi mutindu ba vwandaka na pano na nkokila yina, ya kutelama kuna, mpe yina lendaka kukutana na kimvuka yina ya bantu ya mayele. Ba lenda vwanda ve na lenda ya kusala yina Mfumu me bokila munu na kusala. Mu lenda ve kusala yina Mfumu me bokila bawu na kusala. Kasi beto ke sala kintwadi, mu ke ndima ti beto lenda baka Nsangu, kana beto ke vwanda kaka na ntwala ya Nzambi.

¹⁶ Mpe ntangu yandi pesaka kimbangi awa mazono na nkokila, mpe Mpeve-Santu tubaka na bandinga, mpe, muntu mosi kuna na kati ya nkonga ya bantu, mu ke zabaka ntangu nionso na kuzitisa yawu. Samu, mu me bakula, na nzila ya Biblia, ti ya kele Mpeve ya Nzambi yina ke na kunataka kima mosi na beto. Mpe yandi tubaka, yandi tubaka samu na mvula ya nsuka, mvula ya ntete. Mpe yina pesaka munu dibanza mosi.

¹⁷ Ti Mpangi Bonham me pesa munu mwa paké na mwa basheke na zulu ya yawu, yandi tubaka, “Yayi kele dikabu ya zola samu. . . yina me katuka na bantu.” Ntangu yayi, yandi—yandi, bawu zolaka sala yawu ve. Beno me mona, mu kwisaka awa ve samu na lukano yina. Kasi mu. . . yandi, bawu pesaka munu yawu, mpe, ya kieleka, ya ke vwanda. . . ya ke na mutindu ya kuvutula yawu ve. Mpe mu ke baka yawu, kana Mfumu zola, mpe mu ke meka na kutula yawu na zulu ya badepense ya munu, mu ke kwenda na bayinsi ya nzenza. Samu, ba ke simbisaka munu na mbongo ve, makuki kele ve, kisika mu ke kwenda.

¹⁸ Ya kele mutindu ya kinsweki, samu ti mabuundu ke bika munu ve mu kota. Mpe mu ke kwenda kuna mutindu muzombi, samu ya kele na Mfumu ya munu. Mfumu me tula yawu na ntima ya munu na kusala yawu, mpe mu fwana kwenda na mutindu kubumbama. Beno me mona? Na yina bawu kele na mwa mabanza mosi ya ngitukulu kuna, yina konso muntu zola ti mu sinié kalati mosi, ti mu ke wisana na bawu na yina bawu ke

kwikilaka, mpe ke tubaka ti nkonga yayi *yankaka* kele ya yimbi, mpe kimvuka *yayi* ke tuba ti bawu ke kotisa munu kana mu tuba ti kimvuka *yayi* kele ya yimbi. Beno me mona? Kasi mu ke zolaka yawu ve. Beno me mona, beto kele . . .

¹⁹ Mu ke mekaka ntangu nionso na kutelama na kati ya bantu, na nganda ya organisation mpe baluswaswanu ya bawu, mpe kubokila yina yawu monanaka ti Mpeve ya Nzambi vwandaka tuba na nzila ya bampangi awa na suka yayi, ti beto kele denomination ve. Beto kele bana ya dibuta mosi. Ntangu yayi, ya kele ve na denomination ya Branham. Ya kele na dibuta mosi Branham, mpe beto nionso ke vukana ve na dibuta yina, beto me butuka na dibuta yina. Mpe na yawu, mu, yawu yina mu ke meka kutalisa, ya kulutila yina mu zaba.

²⁰ Ntangu yayi na Galates 4:27-31, mu banza ti mu me sonika yawu awa, mu ke zola kutanga yayi mutindu dilongi.

Samu ba me sonikaka, Sepela, nge kisita yina ke butaka ve; sepela mpe boka, nge yina me kuwa ve mpasi ya kubuta: samu kiadi ke . . . bana ya kulutila yina ke na bakala.

Ntangu yayi beto, bampangi, mutindu Isaac vwandaka, beto kele bana ya nsilulu.

Kasi na yina yandi yina kubutamaka na manima ya nsuni yina monikisaka yandi ti kubutamaka na manima ya Mpeve, mpe ya kele yawu ntangu yayi.

Yinki ke tuba masonuku? Basisa mpika na mwana ya yandi ya bakala: samu mwana ya mpika ke kabula ve difwa na mwana ya kento ya kimpwanza.

Na yina, bampangi, beto kele ve bana ya mpika, kasi ya kento ya kimpwanza.

Bika ti Mfumu kubwela masakumunu ya Yandi ntangu yayi na Ndinga ya Yandi ya ntalu.

²¹ Mu ke na mwa, mazono na nkokila mu sonikaka mwa bima; mpe yawu vwandaka, na ntangu mu vwandaka na lukutakanu mosi na sabala mosi, kisika mosi kuna, Mu—mu lenda bambuka moyo na Masonuku yango kaka pwelele na dibanza ya munu. Kasi ntangu yayi na manima ya munu . . . Ntangu yayi, mutindu mu ke tuba mwa nsaka, mu zola tuba ve ti mu ke sala nsaka awa na estrade yayi. Kasi na manima ya kuluta makumi zole na tanu, mbala ya zole, mu ke bambuka diaka ve mutindu mu vwanda salaka. Ya kele na mingi . . . Ya kele na ba-kilometre mingi na compteur ya Ford yayi ya ntama, mpe na yina mu ke bambuka yawu ve. Kasi na ntangu nionso mu lunga kwenda, mu zola pesa konso kitini ya nkembo ya Yandi Yina vulusaka munu.

²² Ntangu yayi mu, mu me mona na manima na suka yayi, mu me tala . . . Mu banza ti yayi ke monana ya ngitukulu, mpe mu banza samu na mabanza ya muntu ya mayele ya lendaka vukisa

yawu nionso, kasi ya kele kuyika na kima yina ba me bokila munu. Mpe konso kima kele kidimbu samu na munu. Mu ke talaka Yawu, mu ke mona mutindu Yawu ke kwenda. Ya kele mutindu mu ke kuzwaka nsangu ya munu ntangu yankaka, ya kele kutala mbote mpe kumona mutindu Mpeve ke kwenda, mpe kumona yina *yayi* ke tuba, yandi *yina* ke tuba.

²³ Mpe beno me mona munu, bambala mingi, ntete lukutakanu ya kubeluka ya nzutu, mu vwandaka ya kutelama kuna na estrade, to ya kuvwanda na manima, vwandaka tala mbote. Mu ke wa Mpeve, mutindu Yawu ke sala, mpe zaba diambu ya muntu yina me vwanda kuna. Beno me mona? Beno ke mona yawu ntama, *awa*, beno me mona, beno ke simba Yawu ntete beno kwenda na estrade.

²⁴ Bantangu yankaka ntete mu kwiza na lukutakanu, bantangu yankaka, ntete kwandi kukwiza awa mutindu na Californie, Mu me vwanda na bayina vwandaka na munu, mu ke tuba, “Kima mosi ke salama, *yayi* ke salama awa, mpe *yayi* ke vwanda awa, *yayi* ke salama kuna,” beno me mona, samu ti ya kele na kati ya Mpeve ya Nzambi. Yandi kele. . . Yandi zabaka bima nyonso na mbandukulu, beno me mona, mpe na yina Yandi kele Yina kele Kukonda nsuka.

²⁵ Mpe na yina beto me mona, na suka yayi, Mpangi Jewel Rose me telama, nkundi ya ntalu mingi mpe mpangi-bakala ya beto nionso, mutindu ti yandi me telama mpe me tanga Psaumes yango. Beno tala mutindu ya me fwanana, na yina yandi tubaka, “Mu zola tala wapi mutindu ya nkuna yina me kangama na beno.” Mazono na nkokila, Mpeve zonzaka mpe tubaka, mpe samu na, “Mvula ya nsuka, mpe mvula ya ntete mpe ya nsuka, nionso zole ke tiamuka na bilumbu ya nsuka.” Mpe na suka yayi, “Nkuna yina me kangama na beno.” Beno me mona, Mpeve ke tuba, beno tala mbote mutindu Yawu salaka na kati ya balongi yayi, mpe nionso yina, na suka yayi. Na yina mu ke baka dilongi yayi: *Nkuna Ke Kabula Ve Difwa Na Mpusu*.

²⁶ Ya kele kieleka dilongi ya ngitukulu, kasi, *Nkuna Ke Kabula Ve Difwa Na Mpusu*. Mpe na kubakaka, na kubendaka dibanza ya munu ya nsuka na yayi, to na dilongi ya munu, mu zola tuba, na Galates 4:27, tatu, Paul awa ya kieleka ke na kuzonzila nkuna ya kimuntu ya bana zole ya Abraham. Ntangu yayi, yayi, mu zola sadila yayi samu ti beno kondwa yawu ve. Mpe kana mu me luta ntangu ya munu, mu ke vutukila yawu na nkokila yayi. Mpe mu zola kulonga, kaka mutindu lesu ya lukolo ya Lumingu, samu ti beno, mu banza, ke kuzwa lubakusu ya kulutila mbote.

²⁷ Mpe mu. . . Mpe bayankaka na kati ya beno kele—kele na lenda ya kusala yayi kulutila munu, na yina. . . Mu kele ve muntu ya théologie, ata fioti ve. Mpe na yina kana beno ke wisana ve na munu samu na Yayi, beno sala kaka mutindu mu salaka mazono na nkokila ntangu mpangi mosi ya kento ya luzolo awa sadilaka

munu tarte ya cerise. Mu vwandaka ya kuvwanda na ya munu—ya munu. . . na kivinga ya munu na hôte! na suka yayi, mu—mu tutaka nkuna mosi na meno ya munu, kasi mu landilaka kaka na kudia tarte. Mu tulaka kaka nkuna na lweka, beno me mona. Na yina, yawu yina, yina beno ke kwikila ve samu na Yawu, beno tula yawu kaka na lweka, beno me mona, mpe beno landila kaka na kudia yina beno ke banza kele ya kieleka.

²⁸ Ntangu yayi, Paul ke na kuzonzaka na bana ya babakala zole ya Abraham, yina, mosi ya bawu kwisaka na nzila ya Sarah mpe yankaka yina kwisaka na nzila ya Agar. Ntangu yayi beto ke mona awa, mpe beto ke bakula ti na nzila ya Masonuku, ti Nzambi me talisama ata fioti ve na zole. Ya kele na tatu. Ntangu nyonso na tatu, Nzambi kele ya kulunga.

²⁹ Ba-mathématique ya Biblia ke sala ya kulunga. Nzambi kele ya kulunga na tatu, ba ke sambilaka Yandi na sambwadi, mpe nyonso yina. Beno me mona, na yina beto—beto ke mona ti ba-mathématique ya Biblia ke kondwaka ata fioti ve.

³⁰ Mpe beto kele awa na bana zole ya babakala ya Abraham, mpe kasi beto lenda vwanda kaka bilandi ntangu nyonso beto kele mosi ya bana yango, to mwana mosi ya Abraham. “Samu ti beto kele ya kufwa kati na Klisto, na yina beto me kuma bankuna ya Abraham, mpe beto kele bilandi na Yandi landila nsilulu,” na yina Abraham fwana kuzwa Mwana yankaka.

³¹ Ntangu yayi, beto zaba ti mwana ya yandi ya ntete vwandaka na nzila ya Agar, mpe beto monaka ti mwana ya yandi ya zole vwandaka na nzila—vwandaka na nzila ya Sarah. Kasi yandi vwandaka na Mwana ya tatu, yina vwandaka Yesu. Ntangu yayi, yina ke monana ya ngitukulu, kasi yawu yina beto ke meka na kutendula. Mutindu mu tubaka, Nzambi ke kukitalisa Yandi mosi, ntangu nyonso na kati ya kulunga, na tatu. Mpe mu me tendula nionso pwelele na ntwala ya beno nionso ntangu yayi, mpe mingi-mingi na ba-théologien ya beto, ti bima yayi kele kaka mutindu mu ke monaka yawu, mutindu yawu ke kwizaka na munu.

³² Mutindu na mbandukulu, Nzambi, Nzambi zingaka yandi mosi, samu ti Yandi vwandaka Yandi ya Kukonda nsuka, beno me mona, vwandaka kwandi ve Nzambi. *Nzambi* kele “kima ya kusambila.” Mpe Logos, mutindu beto ke bokila Yawu, Ndinga yina basikaka na Nzambi, Ti, muntu nionso kuzaba ti Yina vwandaka Wanzio ya Mfumu, to Ndinga ya Mfumu, yina landaka bana ya Israel na ntoto ya kuyuma; Wanzio ya Ngwisani, Logos yina basikaka na Nzambi. Mpe kuna Logos yango kumaka muntu mpe zingaka na kati-kati ya beto. Ntangu yayi beto kele na kati ya Santu Jean 1, “Na mbandukulu vwandaka Ndinga, Ndinga vwandaka na Nzambi, mpe Ndinga vwandaka Nzambi.” Mpe ntangu yayi, mutindu Yandi pesaka luzingu ya Yandi samu na beto, na yina Mpeve ya Yandi ke vutuka na zulu ya beto. Yesu

tubaka, “Na kilumbu yina beno ke zaba ti Mu keke na kati ya Tata, Tata na kati ya Munu; Munu na kati ya beno, mpe beno na kati ya Munu.”

³³ Beno me mona, Yawu keke Nzambi, na mutindu nionso, Nzambi ke kukimonikisa Yandi mosi, ke sala Yandi mosi na nzila ya bansungi ya luswaswanu. Na yawu tatu yina, ya Tata, Mwana, mpe Mpeve-Santu, Nzambi mosi na kusalaka na bisalu tatu. Mpe beto bubu yayi keke mosi, Dibuundu Yawu mosi, kinama ya dibanza ya Nzambi keke dibanza na ntwala ya mbandukulu ya yinza, samu na kuvwanda na Dibuundu. Na yina bayina keke kati na Klisto vwandaka na kati ya Klisto na mbandukulu, yina vwandaka mabanza ya Yandi, mpe mabanza ya Yandi keke bisalu ya Yandi.

³⁴ Awa nkuna me banda, na nsilulu. Mpe Abraham awa tulaka ntembe fioti, na nzila ya Ismael. Mpe mu zola talisa na beno batape tatu ya yayi, ya Nkuna yayi beto ke tubila, yina keke ve kilandi na mpusu. Ntangu yayi beto ke mona ti, na mbandukulu awa, ti Nzambi pesaka Abraham nsilulu.

³⁵ Yandi pesaka Adam nsilulu, ntete. Mpe ya vwandaka, to, ngwisani vwandaka na misiku. “Kana beno ke sala ve *yayi*. Kana beno ke sala *Yayi*.”

³⁶ Kasi ntangu Yandi pesaka yawu na Abraham, ya vwandaka kukondwa musiku, “Mu me sala yawu dezia.” Yandi ata mbala mosi ve. . . Yina Yandi salaka, ya vwandaka kukondwa musiku, Yandi pesaka na Abraham. Ntangu yayi, mpe na nzila ya yina, Abraham na kuzwaka nsilulu, na yina beto fwana vwananda Nkuna ya Abraham. “Ya vwandaka kaka ve samu na Abraham, kasi na Nkuna ya yandi na manima ya yandi.” Ntangu yayi kana beno tala, ya vwandaka ve “bankuna” na manima ya yandi, kasi “Nkuna” na manima ya yandi.

³⁷ Ntangu yayi beto ke mona ti nsilulu, na kuvwandaka na ntembe fioti na nzila ya Sarah, mpe Sarah tubaka na Abraham na kubaka Agar yayi, kento ya Égypte, ntwenya ya kento, mutindu kento ya yandi, mpe yina ke vwanda mutindu yina Nzambi ke telemisa nkuna yayi ya nsilulu.

³⁸ Ntangu yayi, beno me mona, kubanda mutindu mu tubaka mazono na nkokila, kubasika fioti na manaka ya kieleka ya Nzambi ke bebisa mambu nionso. Beto lenda ve kukatuka na Ndinga yina ya kisina. Ya ke. . . Beto zonzilaka yawu mazono na nkokila, to mazusi na nkokila, mu zola kutuba, samu na Balaam. Yandi vwandaka na mvutu ya Nzambi, ya kusungama mpe ya kieleka, “Kukwenda ve!” Kasi Yandi keke na luzolo ya muswa. Mpe beno lenda sala yawu kana beno me zola, mpe Nzambi ke sala yawu zitisa Yandi, kasi ya keke ve luzolo ya kulunga ya Nzambi. Mpe yawu yina beto fwana sala kingolo-ngolo samu na kuzwa yawu, luzolo ya Yandi ya kulunga, luzolo ya Yandi ya muswa ve. Kimfumu ya Nzambi, yina Yandi . . . keke na ntoto

bubu yayi, ke . . . lenda ata fioti ve kusalama, na luzolo ya muswa. Ya fwana vutuka na luzolo ya Yandi ya kulunga.

³⁹ Ntangu yayi beto ke mona awa ti Sarah, na manima Nzambi tubaka na Abraham ti mwana ke butuka na nzila ya Sarah, yina ke sakumuna yinza, ntangu yayi Sarah tulaka yawu ntembe. Mu zola beno kutala, ata mbala mosi ve ti ya kwizaka na nzila ya Abraham; kasi na nzila ya Sarah, kento. Mpe yandi tulaka ntembe na yawu, mpe yandi tubaka, “Baka Agar.” Mpe Abraham zolaka ve kusala yawu, kasi Nzambi tubaka na yandi na kukwenda na ntwala mpe kusala yawu na mutindu nyonso. Na yawu yandi salaka yawu, yandi salaka ntembe na yawu. Ntangu yayi, Isaac, na kuvwandaka ya kimpwanza mpe ya kento ya nsilulu, lendaka ve kuvwanda kilandi na Ismaël, yina basikaka na kento ya mpika, na kati ya ntembe.

⁴⁰ Ya kele yina Paul vwandaka meka na kutuba awa. Beno me mona, kisika kima mosi kele na ntembe, mpe ya ke kubwisa kima mosi ya Nzambi, samu na ntumunu ya Nzambi, kasi ya ke vwanda ve difwa na ndonga ya kieleka ya Nzambi. Beno me bakula? Beno me mona, ya lenda vwanda ve kilandi.

⁴¹ Ntangu yayi ya kele samu na yina mu kele na ngolo mingi bubu yayi. Mpe mu banzaka ti yayi ke vwanda ntangu mosi ya mbote, samu mu zaba ve bantangu yikwa beto ke vwanda kintwadi, mpe, mu banza ti mu lendaka, na mutindu mosi kana Nzambi ke sadisa munu samu na kutalisa beno samu na yinki mu ke sembaka ngolo mingi nsambulu ya kubongisa. Beno me mona? Beno me mona, ya lendaka ve kukabula difwa na manaka ya kieleka ya Nzambi, samu ti organisation kele ve ya Nzambi. Ya kele ya muntu. Dibuundu ya ntete vwandaka ya kubongisa, na yinza ya muvimba, vwandaka dibuundu ya Katolika ya Rome na Nicée, na Rome. Apocalypse 17, ke tuba, “Yandi vwandaka kento ya kindumba, mpe bana ya yandi nionso vwandaka bakento ya kindumba.” Mpe ndumba kele kento yina ke zingaka kieleka ve na bakala ya yandi, mpe kento ya kindumba kele mutindu mosi. Kasi, beno me mona, yawu kumaka dibuundu, na mutindu nionso. Yawu kele systeme mosi me sola mpe yawu ke kabisaka kimpangi. Beto mekaka na kuvukisa mabuundu nionso na organisation. Ya ke simba ve; ata mbala mosi ve ti ya simbaka. Ata mbala mosi ve ti ya ke simba. Conseil Mondial ya Mabuundu, bawu kele kaka . . . bawu kele na nganda ya dikani ya Nzambi.

⁴² Ntangu yayi beno ke tuba, “Nani nge kele, nge yina me telama kuna nge yina me manisa ntete ve lukolo ya fyoti?” Yina ke sala ata luswaswanu ve, yinki kulonguka kele. Ya kele malongi ya munu ve yina mu ke na kumeka na kuzonzila.

⁴³ Ya kele Ndinga ya Nzambi mu ke na kuzonzila, beno me mona. Mpe bansiamisa yayi yina beno ke mona na ministere, ya kele munu ve, ya kele Nzambi ke na kumeka na kunata yawu na beno, ti ya kele Kieleka. Nzambi ke na kima ya kusala

na luvunu? Na yina ntama mingi yawu kuvwanda na munu, kusadila Nzambi yina ke sakumuna luvunu. Ya kele Kieleka yina Yandi ke sakumunaka, Kieleka yina Yandi me zitisa.

⁴⁴ Ntangu yayi, Ismaël lendaka ve kukabula difwa na Isaac, samu mosi tulaka fioti ntembe, tulaka kaka ntembe fioti. Yandi vwandaka mwana, yandi vwandaka kaka nkuna ya Abraham, kasi ve nzila ya Nzambi ya kulunga samu na yawu; Ismaël. Ntangu yayi mu lendaka lutisa ntangu mingi awa, kasi mu ke tula kivuvu ti Mpeve-Santu ke tendula yawu na beno na mutindu ya kieleka yina ya lendaka vwanda. Ntangu yayi kana bawu . . .

⁴⁵ Kana Ismaël mpe Isaac lendaka ve kukabula difwa kintwadi samu manaka ya kieleka ya Nzambi vwandaka ya kuyingisa na makani ya Nzambi yina ba me pesila muswa, nzila ya Nzambi ba me pesila muswa yina Nzambi sakumunaka, to Dibuundu ya kimpeve lenda vwanda ve kukabula difwa na dibuundu ya denomination. Mabuundu ya denomination, Nzambi sakumunaka bawu, mutindu Yandi salaka na Ismael, kasi ya Kimpeve ke kabula ve difwa na bayankaka. Ya kele kieleka. Ya ke vwanda, yina ke basika na dibuundu denomination (dibuundu yina ya nkumbu, dibuundu ya kimuntu), ke kwiza Kento ya makwela ya Klisto, Musolami.

⁴⁶ Ntangu yayi kuna, yina ke yangisaka munu na ngunga yayi, ya kele kumona ba-denomination yayi nionso ke kota na yina beto zaba kele. . . yina beno ke bokilaka mvula ya nsuka, to, kutiamuka ya Mpeve. Beno zaba ti Yesu tubaka, ti, “Ntangu yina ke salama, ya ke vwanda nsuka”? Ntangu, mwense ya bulawu mpe mwense ya ndwenga kabulaka ve difwa kintwadi. Na yina ntangu . . . Mwense ya bulawu, yandi vwandaka mwense, yina vwandaka ve na Mafuta. Kasi ntangu yandi kwisaka samu na kusumba Mafuta, ya vwandaka na ntangu yina Bakala ya makwela kwisaka. Mpe yandi bikanaka na nganda, na ntangu yandi vwandaka meka na kusumba Mafuta. Beno me bakula? Mu zola yawu kukota, na mutindu ya mbote. Ntangu yayi, ya kieleka mu lendaka ve kukwenda ntama na dilongi yayi. Ntangu yayi, to dyaka Kimpeve mpe kimuntu ke kabula ve difwa kintwadi.

⁴⁷ Kikuma yawu yina Enlevement, Kento ya makwela, mwense ya ndwenga, bayina ba me bokila na kubasika, bayina ba zabaka na ntwala, bayina soolamaka! Na yina, beno bantu ya mumbongo beno ke twadisa ve bureau ya beno mutindu bantu yankaka ke mekaka na kubanza ti Nzambi ke twadisaka manaka ya Yandi, na kintulumukina. Nzambi zabaka, na ntwala ya mbandukulu ya yinza, nani ke kuzwa mpulusu mpe nani ke kuzwa mpulusu ve. Na predestinqtion, na luzabu ya mantwala, Yandi monaka konso mambele, tulaka nkumbu nionso na Buku ya Luzingu ya Mwana-dimeme, ntete Dibuundu kubanda. Yesu kwisaka samu na kusosa mpe kuvulusa bayina vwandaka na Buku yina. Yandi sumbaka Buku ya Mpulusu. Ya vwandaka ya

kuzimbana, mpe Yandi vulusaka beto, mpe bankumbu nyonso vwandaka na Buku yina vulukaka ntangu Yandi vulusaka beto.

⁴⁸ Na yina, mutindu mu me tubaka bambala mingi, beno zaba yawu. Ya kele samu na yina beno kele awa na suka yayi, yawu yina beno ke basika na ba-organisation nionso yayi mpe bima nionso yayi. Beno kele. . . Ya kele na Kima ke na kubenda beno. Mutindu mwa dibanza ya munu vwandaka, samu na ngononi yina me butuka na nsusu ya kento, beno me mona, beno—beno ke bakula ti ya kele na kima kuswaswana. Dibuundu vwandaka ve na kima ya kusepelisa. Kasi, beno, beno kuwaka kima yankaka yina vwandaka kuboka, beno bakulaka ti, beno butukaka samu na Yawu. Beno kele kitini ya Yawu. Beno, beno butukaka samu na Yawu, mutindu gang na diboko. Kikuma yawu yina beto me vukana awa na suka yayi, samu, mutindu mama ya munu ya kiboba ya sud vwanda tubaka, “bandeke ya bansala mosi ke pumbukaka kintwadi,” samu ti beno kele na bima na mutindu nyonso.

⁴⁹ Nkonga ya bakoko-mbele mpe mayembe kele na kima ve na mutindu nyonso. Madya ya bawu kele mutindu yankaka, ata ti yembe lendaka butama na yinzo ya scie. Ya kele kieleka. Ya me tala na yina ya vwandaka, na kubanda. Ntangu yayi, mpe na yawu, ata ti, yembe lendaka vwanda ya kufuluka na maza na nzila ya yawu, na nzila ya koko-mbele yina, kasi na nsuka yandi ke kuzwa bakala ya yandi.

⁵⁰ Yawu yina Dibuundu ke sala bubu yayi, samu ti Yesu kele Ndinga mpe Yandi kele Bakala ya makwela, mpe Kento ya makwela kele kitini ya Bakala ya makwela. Na yina Ndinga yina ke salama bubu yayi kele kitini mosi ya Ndinga yina me lunga na kilumbu ya Yandi, mpe ya kele Ndinga mosi, kimbangi mosi, Luzingu mosi.

⁵¹ Samu ti, ntangu Nzambi kabulaka Adam, yandi vwandaka mbala zole. Beto monaka, Adam vwandaka mpeve, na mbandukulu. “Yandi salaka muntu na kifwanisu ya Yandi Mosi, vangaka Yandi bakala mpe kento.” Na yina, Genèse 2 mpe kulandila, Yandi vangaka bakala na kati. . . na putulu ya ntoto. Muntu vangamaka na kifwanisu ya Nzambi (Nzambi kele Mpeve), na yina yandi kele mpeve ya muntu. Na yina ntangu yandi kumaka muntu, niama na zulu ya ntoto, Yandi ke—Yandi ke na kotalisa, ke na kotalisaka awa Kento ya makwela. Yandi bakaka ata fioti ve mpe salaka muntu yankaka, kasi Yandi bakaka kitini ya Adam, kivangu ya kisina, katulaka yandi, lumpanzi ya lweka ya yandi; mpe me basisa mpeve ya kento na Adam, me bika mpeve ya bakala na kati kuna, mpe me tula yawu na kati kitini ya bukento. Na yina, kitini ya mpeve ya yandi, kitini ya nzutu ya yandi; nzutu ya nsuni ya yandi, mikwa ya yandi; Ndinga ya Ndinga ya Yandi, Luzingu ya Yandi, mpe ya kele mutindu Kento ya makwela kele na Klisto!

52 Ya kele samu na yina Enlevement ya Nkuna ya kimfumu fwana kwisa ntete. Mpe bantu yankaka ya kufwa ke zinga ve bamvula funda mosi, na manima ba ke nata bawu na Kiti ya Mpembe ya Lufundusu. Beno me mona, ya kele ve na lufundusu samu na Nkuna ya kimfumu, to Nkuna yina ba solaka ntete ya Abraham. Ntangu yayi kana beno baka Santu Jean 5:24, beno kuwa yayi, “Yandi yina ke kuwa Ndinga ya Munu, mpe ke kwikila na Yandi yina fidisaka Munu, kele na Luzingu ya kukonda nsuka.”

53 Ntangu yayi wapi mutindu ya ke vwanda ya kuswaswana mingi na ba théologie ya beto mingi? Ntangu yayi mu lenda basika awa mpe kutuba na munwi-malafu, “Nge ke kwikila?” “Ya kieleka!” Bakala yina ke zinga na kento ya muntu yankaka, “Nge ke kwikila?” “Ya kieleka!” “Nge vwandaka na lukutakanu mazono na nkokila, samu na kuwa Ndinga?” “Ya kieleka!” “Nge ke kwikila Yawu?” “Ya kieleka!” Yandi ke tuba yawu kaka.

54 Kasi ntendulu ya kisina ya Ndinga yayi, “yandi yina ke bakula Ndinga ya Munu, mpe ke kwikila na Yandi yina fidisaka Munu.” “Yandi yina ke bakula,” ya kele, na yandi yina Yawu ke zabana.

55 Yesu tubaka, “Muntu ve lenda kwiza na Munu kana Tata ya Munu me benda yandi ve. Mpe bayina nionso Tata ya Munu pesaka Munu, bawu ke kwisa. Mameme ya Munu, ke kuwa Ndinga ya Munu. Bawu ke landa ve Nzenza.” Mpe yinki kele Ndinga ya Nzambi? Ya kele Ndinga ya Nzambi. Yinki kele ndinga ya muntu kasi ndinga ya yandi? Ya kele Ndinga ya Nzambi; bawu ke kuwa Ndinga ya Nzambi.

56 Nkuna ya kimuntu yina vwandaka kaka munati, na nzila ya Ismael ya ntete, Isaac na mbala ya zole, na manima tii na Nkuna. Kaka mutindu yinti, mwinga, mpe mpusu, ya disangu. Ntangu yayi, awa, ba etape tatu ya nkuna ke talisa na beto foto ya kieleka ti mu zola ti beno bakula na munu na suka yayi. Beto ke na kumona awa.

57 Mpe na yina mu me longukaka ve, mu fwana baka bima ya kimuntu yina mu ke mona, samu na kufwanikisa bima ya kimpeve yina me salama na munu, samu mu lenda tuba na beno ve na grammairer ya mbote.

58 Mpe, na mutindu nyonso, Nzambi ke fwanikisa ntangu nyonso kimpeve na nzila ya kimuntu. Kana ya vwandaka ve na Biblia, mu ke zaba kaka ti Buklisto vwandaka kieleka, samu ti ntoto ya movimba ke na kulanda kutambula ya lufwa, luzikulu, mpe mvumbukulu. Yinza ke salaka lufwa, luzikulu, mpe mvumbukulu.

59 Beno tala masa ya yinti yina ke basikaka na yinti, wapi mutindu ya ke buta matiti, mpe mbuma, ke kubwaka; ke vutuka na ntoto samu na madidi ya hiver, ke kulumuka na nsi ya yawu; ke basika diaka na printemps, na luzingu ya malu-malu. Konso

mvula, ke na kupesa kimbangi ti ya kele na luzingu, ya kele na lufwa, ya kele na mvumbukulu.

⁶⁰ Mwini ke basikaka na suka mosi, mwa bébé yina me butuka, ya kulemba mingi. Na ngunga ya sambwadi to ngunga ya nana, ya ke banda na kukwenda na lukolo. Na ngunga kumi to kumi na mosi, ya ke basika na lukolo ya nene. Ya ke sema na ngolo ya yandi, kubanda na bamvula kumi na mosi tii na tatu, na yina ya ke banda na kulemba. Na nkokila ya ke kulumuka, ke lemba, kiboba ya bakala. Ya kele nsuka ya yawu, ya ke kufwa? Ve. Ya ke telama dyaka na suka yina ke landa. Beno me mona?

⁶¹ Yinza nyonso, Biblia ya beno ya kieleka yina vwandaka bambangi na Biblia yayi! Mpe yawu yina mu ke meka na kutalisa na beno na suka yayi ntangu yayi, na nzila ya yinza beno ke mona Ndinga ya Nzambi, ke baka kifwanikisu ya Ndinga ya Nzambi, samu yinza kele mvangulu ya Nzambi.

⁶² Mutindu science, bawu ke kuzwa mekaniki mpe misiku ya yinza, kasi bawu zaba ve yinki yinza yina kele. Bawu zaba ve Luzingu ya yinza. Yina kele Nzambi. Na yawu, mekaniki kukondwa dinamiki kele na mfunu ve.

⁶³ Ntangu yayi, yinti, mwinga, mpe mpusu, beno tala. Agar awa me talisa mwinga, yina vwandaka luzingu ya ntete yina bandaka na nsilulu. Sarah ke talisa felele, to putulu, ke kwisa na felele. Marie, mwense, talisamaka mpe basisaka Nkuna ya kieleka ya kimpeve, samu na kubasisa mwinga ya kieleka. Agar mpe Sarah, samu na bawu zole ya vwandaka na nzila ya sexe. Kasi Marie, mwense, ya vwandaka na nzila ya ngolo ya Ndinga ya Nzambi yina silamaka, na nzila ya lubutuku ya bumwense. Yandi butaka Nkuna ya kieleka. Mwinga, Agar, kento ya zole, na nzila ya ntembe na nsilulu, ya salamaka samu na ntembe, ya fioti.

⁶⁴ Mu banza kaka, bika ti Nzambi kusadisa beto. Mu ve. . . Mu zola ti beno mona yayi, yimbi mingi. Beno lenda tula ntembe ve na Yawu. Beno fwana baka Yawu kaka mutindu Yawu kele. Yawu ke na nsatu ya ntendulu ve. Biblia ke tuba ti, “Ndinga ya Nzambi kele na nsatu ve ya ntendulu ya muntu mosi.” Nzambi ke na nsatu ya balukolo ya beto ve samu na kutendula Ndinga ya Yandi. Ntangu Yandi ke siamisa Yawu mpe ke sala ti Yawu kuzinga, yawu yina kele ntendulu ya Yawu. Ntangu Nzambi tubaka, “Bika ti nsemo kuvwanda,” nsemo vwandaka kuna. Yina ke na nsatu ya ntendulu ve. Ntangu Yandi tubaka, “Mwense mosi ke kuzwa kivumu,” yandi kuzwaka kivumu. Ya ke na nsatu ya ntendulu ve.

⁶⁵ Beto ke na nsatu ya nionso yayi ve, baseminere ya yawu mpe bima yina ke nata bantu, “Mbote, *beto* ke na ntendulu. *Beto* ke na ntendulu.”

⁶⁶ Nzambi Yandi mosi ke tendula Ndinga ya Yandi Mosi. Yandi ke na nsatu ya muntu mosi ve samu na kutendula Yandi. Yandi tubaka, “Ya ke salama,” mpe ya ke salama. Yandi tubaka, “Na

bilumbu ya nsuka, Yandi ke mwangisa Mpeve ya Yandi,” Yandi salaka yawu. Mu ke kipe ve yina ba denomination ke tuba. Yandi salaka yawu, na mutindu nionso, samu Yandi tubaka ti Yandi ke sala yawu. Na yawu, Yawu ke na nsatu ya ntendulu ve, samu Nzambi ke sala ntendulu na Yandi Mosi.

⁶⁷ Mpe bima yayi yina beno ke mona, yina ke monana ya mansweki samu na beno ntangu yayi, kana beno ke... Beno ke bambuka moyo na ministere ya beno, beno ba-Pentecotiste, kuna na manima bamvula makumi tatu to makumi yiya me luta, ya vwandaka kaka mansweki mingi samu na dibuundu ya ba-Methodiste na ba-Baptiste, mutindu Yayi kele samu na beno bubu yayi. Kasi ntangu yayi beno tala Yawu na kati ya Ndinga. Mu ke na kumeka na kulakisa beno mutindu beno mekaka na kulakisa yawu. Mpe na yina kana Nzambi ke baluka mpe ke tuba ti Ya ke mutindu yina, na kati ya Ndinga, na yina ke siamisa ti Yawu kele mutindu yina, yina kele ntendulu ya Nzambi Yandi mosi. Beno ke na nsatu ya muntu ve samu na kutendula yawu na beno.

⁶⁸ Ntangu yayi, Agar, na nzila ya “kima ya fioti”! Beno bambuka moyo, nge lenda ve kukatula Ndinga mosi na Kuna. Mpe Yesu tubaka, na Apocalypse, na nsuka ya Buku. Mpe na ntete ya Buku, Klisto tubaka, “Muntu nyonso yina me katula Kitini mosi na Ndinga yina!” Kaka Ndinga mosi tendulaka yimbi, nataka konso kimbevo, lufwa, yina beto me kuzwaka ntete ve. Mbote, kana Nzambi, Yina kele ya santu, me tala na yisi; mpe me sala poto-poto nyonso yayi na nzila ya ntendulu ya fioti ya yimbi ya Ndinga mosi, mpe mwa kima ya fioti nionso me telemina Ndinga yina ya mazulu nataka poto-poto nyonso yayi; mpe mpasi, kubasika ya menga mpe kufwa Mwana ya Yandi Mosi, samu na kuvutula ngwisani na kima yayi ya boma na Yandi; wapi mutindu beto ke kota na mutindu yankaka na kisika ya kukeba Ndinga nionso?

⁶⁹ “Mbote,” beno ke tuba, “Mpangi Branham, yina vwandaka na Genèse.” Mu me kuwa yawu, beno me mona.

⁷⁰ Kasi beno bika mu tuba na beno, Apocalypse, yina kele kitini ya nsuka ya Buku. “Muntu nyonso yina ke katula Ndinga mosi ya Buku ya profesi yayi, to kuyika ndinga mosi na Yawu, ba ke katula kitini ya yandi na Buku ya Luzingu.”

⁷¹ Yesu tubaka, na kati-kati ya Buku! Beno tala dyaka bambangi tatu ya beno: Genèse, Ngwisani ya Malu-malu, mpe kilumbu bubu yayi. Yesu tubaka, “Muntu ke zinga kaka ve na dimpa, kasi na Ndinga nionso ke basika na yinwa ya Nzambi.”

“Mbote, Yandi zolaka kutuba yawu ve.”

⁷² Yandi vwandaka tuba na bantu yina vwandaka ba-théologien, na kisika ya kulutila zulu. Banganga-Nzambi yina, nkooko ya nkooko ya nkooko ya nkooko ya nkooko ya bankooko ya bawu vwandaka banganga-Nzambi. Samu na kutendula

Ndinga mosi ya Yawu mbote, ya vwandaka kieleka kitumbu ya lufwa. Ba zolaka losa bawu matadi, samu ti Ndinga mosi zimbanaka. Kasi bawu vwandaka na ntendulu ya yimbi ya Yawu. Na yina ntangu Ndinga Yawu mosi; ntangu Nzambi silaka na kutinda Mesiya, mpe fidisaka Yawu ya kuinga mutindu Yandi silaka Yawu ke kwisa, ba vwandaka na mavunga ya kuswaswana samu na kuinga Yawu.

⁷³ Beno bika mu tuba yayi: Mutindu mosi ya kele bubu yayi, ti bawu ke bakula Yawu ve! Ya kele ve na divunga ya denomination to bantu ya mayele. Ya ke na kati ya divunga ya masa mpe ya mvumbukulu, mpe kumonisama ya Klisto yina me vumbuka na lufwa, mutindu Nzambi silaka Yawu, mpe na divunga ya mabanza ya bantu ve samu na Yawu.

⁷⁴ Ntangu yayi, Agar, na nzila ya mwa luswaswanu ya fioti, na nzila ya kento, ve na nzila ya Abraham ntangu yayi. Abraham zolaka ve kusala yawu, kasi Nzambi bikaka yandi kusala yawu samu ti yandi. . . Kima mutindu mosi, Yandi bikaka Balaam kukwenda na ntwala. Beno tala ntangu yayi, na nzila ya luswaswanu ya fioti samu na Yawu, yandi butaka Ismaël, yina vwandaka muntu ya mfinda, yina nungaka ata fioti ve. Yandi zingaka pene-pene ya mabolongo ya yandi. Yandi vwandaka muntu ya mfinda. Yandi kele diaka, bubu yayi.

⁷⁵ Ntangu yayi Sarah, felele, to putulu, Sarah, kento ya kieleka ya nsilulu, butaka muntu ya lutondo, na kuvutuka yandi butaka yinsi ya nsilulu.

⁷⁶ Ntangu yayi, kasi, Marie, na nzila ya sexe ve, kasi na nzila ya nsilulu, kaka mutindu Abraham kuzwaka nsilulu na Nzambi, Ndinga ya Nzambi, kasi kwikilaka nsilulu, “Beno tala kisadi ya kento ya Mfumu,” beno me mona, yandi butaka mwinga ve, kasi Nkuna ya kisina, samu Yandi vwandaka Ndinga yina Abraham kwikilaka mpe yina Marie kwikilaka.

⁷⁷ Ntangu yayi, Marie vwandaka ve Nkuna, yandi vwandaka kaka mpusu ya Nkuna. Bayankaka zole vwandaka minati ya luzingu, kaka nkuna ya kimuntu. Marie vwandaka ve Nkuna, yandi mosi; kasi na lukwikilu na Ndinga ya Nzambi, yina me pesa kifwanikisu ya kieleka ya Ndinga, samu Yandi vwandaka Ndinga. Kasi mutindu mpusu, . . . ya blé, mbuma ya blé, mpusu ke bumbaka blé na kati ya yawu mpe ke kebaka yawu tii kuna ya ke kuma na lenda to kuyela mingi samu na kutambula yawu mosi. Beno me mona? Na yina, ya vwandaka Nkuna Yawu mosi yina bikaka yandi. Kaka mutindu, Nkuna vwandaka na kati ya kivumu ya yandi, yandi vwandaka ve Nkuna. Yandi basisaka ve Nkuna. Nzambi kele Nkuna.

⁷⁸ Ntangu yayi, menga na yina, bantu mingi ke banzaka ti ya vwandaka menga ya Juif yina vulusaka beto. Mpe bayankaka na kati ya bawu tubaka, “Mbote, beto kele na muswa na nzila ya Bantu ya makanda, samu Rahab kento ya kindumba mpe—mpe

Ruth muntu ya Moab, mpe nionso yina, bawu vwandaka Bantu ya makanda.” Beno ke na nsatu ya yawu ve, ata fioti ve. Yandi vwandaka Juif to Muntu ya makanda ve.

⁷⁹ Yandi vwandaka Nzambi, Logos, Ndinga yina basikaka na Nzambi. Ntangu, Yawu bandaka na kufika ntoto, mpe Yawu basisaka luzingu ya masa. Ntangu Mpeve ya Nzambi, Logos, Ndinga, yina kele Nzambi tubaka, “Bika yawu kuvwanda,” mpe kuna basikaka Logos, yina kele Ndinga. Mpe Ndinga bandaka na . . . samu nionso yayi vwandaka na kati ya Logos; Ndinga ya muvimba ya Nzambi, Biblia ya muvimba, na bansungi nionso. Mpe mutindu Logos bandaka na kupema na zulu ya ntoto, luzingu ya masa kwisaka; mpe yawu bandaka na nsi, na luzingu ya ndeke tii na luzingu ya niama. Mpe na nsuka kima mosi kwisaka kuna samu na kutalisama, to kima mosi vwandaka ya kufwanana na yawu, vwandaka fika yawu, Nzambi, muntu na kifwanisu ya kieleka ya Nzambi.

⁸⁰ Muntu yina kubwaka, mutindu nkuna fwana kubwa. Mpe na yina Nzambi bandaka na kufika yawu, na manima ya kubwa. Yandi telemisaka Enoch, Yandi telemisaka Élie, Yandi butaka Moïse, Yandi telemisaka profete na manima ya profete, samu na kumeka kuvutula diaka kifwanisu yina. Mpe, na nsuka, na zulu ya ntoto kwisaka kifwanisu ya kieleka ya Nzambi Yandi mosi diaka, yina vwandaka Nzambi, Logos me kuma nsuni mpe me zinga na kati-kati ya beto.

⁸¹ Ntangu yayi Logos mosi yina kele na ndambu, Yandi kele na Kento ya makwela, mpe Logos mosi, Ndinga yayi yina lenda vwanda ve ya kulemba, ke fika mabuundu bubu yayi, ke meka na kuvutula Ndinga na kumonisama ya Yawu ya muvimba. Na yina, ba-profete vwandaka vukana na Nkuna yina, mpe ba-denomination vwandaka na minati ya Nkuna ntangu yayi. Ntangu yayi beno tala, na nswalu, kasi mutindu mpusu ke salaka, ke vingila na kati ya Nkuna ntangu yayi, na yina yawu ke bika yandi.

⁸² Yesu vwandaka Nzambi. Yandi vwandaka. Tata ya Yandi vwandaka Logos ya nene Yawu mosi. Mpe Yandi lendaka mwangisa Yawu nionso ve na Moïse, samu yandi vwandaka profete.

⁸³ Mpe Ndinga ya Mfumu ke vwandaka ntangu nionso, ke kubwa ata fioti ve, ke kwisaka na profete. Ya kele ve na kisika, ata ntangu ve, na kati ya Biblia, to kubanda Biblia, ti ntendulu ya kieleka ya Ndinga ke kwisaka na théologien. Yawu kele ve na kati ya Masonuku. Ata mbala mosi ve ti ba-Pharisien, ata mbala mosi ve ti ba-Sadducéen salaka, mpe ata mbala mosi ve ti Nzambi basisaka profete mosi na kati ya bawu, mpe ata mbala mosi ve ti Yandi salaka na bilumbu ya nsuka yayi.

⁸⁴ Kaka na ntangu bawu ke telema, bawu nionso ke vukana mpe ke sala organisation mosi, kuna ya ke fwa. Kasi ya kele

samu na lukanu ti Yandi salaka yayi. Beto ke meka na kutendula yawu, Nzambi kusadisa beto. Beno tala, beno tala awa yandi me kuma pene-pene, dibuundu, nkuna ntangu yayi, ya ke fwanana na Nkuna Yawu mosi.

⁸⁵ Ntangu yayi beno tala, ntangu nkuna ke kwendaka na kati ya ntoto, ya kele nkuna ya kieleka. Ntangu yawu ke basika, yawu ke butaka luzingu. Kasi yinki luzingu ke salaka na nkuna ya blé? Ya ke basisa ve mwinga mosi ya blé na ntangu yina, to mbuma mosi ya blé. Ya kele luzingu ya blé, kasi ya kele na kitini ya munati. Mpe yina vwandaka kusungika ya ntete, ntangu Luther kubasikaka na mpimpa ya poto-poto. Ya zolaka kufwa.

⁸⁶ Na yawu bambala mingi, bantu ke talaka kiadi. Oh, mpe mu tangaka buku mosi ntama mingi ve, na, *Nzambi Ya Swi*, me sonika na nzila ya ba-philosophe yayi ke sosaka kunata beno ntama na Nzambi. Kana beno zaba ve Ndinga ya Nzambi mpe dikani ya Nzambi, beno lenda ningana kukondwa mpasi. Kasi ntangu beno ke mona dikani ya Nzambi, manaka ya Yandi, na yina na nzila ya lukwikilu beno zaba ti ya kele Nzambi; mpe Nzambi ke na kukitalisa Yandi mosi, ke na kusala kaka yina Yandi salaka na—na bantangu yankaka, ke na kutambula, ke na kusiamisa.

⁸⁷ Ya kele samu na yina Moise lendaka ningana ve. Yandi solulaka mbunzu na mbunzu na Nzambi, mpe Nzambi tubaka na yandi, “Mu kele Yandi yina vwandaka na Abraham kuna na manima. Mu kele Yandi yina salaka nsilulu yayi. Mu ke vwanda na beno.” Wapi mutindu beno ke telemisa bakala yina?

⁸⁸ Mutindu profete ya kiboba tubaka, “Na ntangu nkosi ke boka, nani ke vwanda na boma ve? Mpe Nzambi me tuba, nani ke pesa profesi?” Ntangu beto ke mona bima yina Nzambi silaka na ngunga yayi, kumona yawu ke zibuka, wapi mutindu beno lenda telama kaka ntangu beno ke mona ti ya kele mutindu ya Yandi? Yina Yandi tubaka, ya ke salama. Beno me mona bima nionso ya mansweki, kasi ya kele kaka kieleka mutindu Nzambi tubaka ti ya ke salama.

⁸⁹ Ntangu yayi beno tala, “yandi,” munati. Ntangu yayi, Agar basikaka mutindu mwinga, mpe na manima me kwiza bandikila, mpe kuna me kwiza mpusu, mpe na manima me kwiza Nkuna. Ntangu yayi beno tala mbote minati yayi, mu zola beno kutala mbote, ntete.

⁹⁰ Ntangu yayi, mwinga ke fwanana ve mutindu Nkuna, kasi Luzingu yina vwandaka na kati ya Mbuma kele na mwinga. Yina vwandaka Luther. Ntangu yayi, mwa mwinga kele na mitindu mingi; yawu me katuka na Luther, na Zwingli, mpe na ya me landila Calvin mpe bantu mingi yankaka.

⁹¹ Ntangu yayi beno tala, na yina, yawu sobaka kisika ya yandi. Beno tala mbote yina ntangu yayi na kusala na Ndinga ya Nzambi, mutindu mwini; lufwa, luzikulu, mpe mvumbukulu.

Na manima ke kwisa putulu, yina vwandaka Wesley. Mpe kuna na kati vwandaka na mwa baputulu mingi yina vwandaka na zulu ya yawu, yina vwandaka ya kufwanana mingi na Nkuna kulutila yina dititi yina vwandaka, na zulu ya blé to disangu. Yina vwandaka ya kufwanana mingi na yawu; Wesley na Ndinga ya zole, Ndinga ya zole ya Nzambi, samu na kuzangula dibuundu ya Yandi, mpe kwisaka na kusantisama. Yina vwandaka nsangu ya yandi. Mbote mingi.

⁹² Na yina, na manima ya mwa ntangu fioti, yina kubwaka mpe kwendaka diaka na mwinga, mpe basisaka diaka dikutu ya disangu. Kasi na ntuala dikutu yayi kubanda, ya vwandaka na makelele, mpusu, divunga, envelope. Mpe kisadi nionso ya blé, kisadi nionso ya masangu, kana beno ke timuna kuna mpe ke basisa dikutu yina ya disangu to dikutu yina ya blé, beno ke banza ti mwa—mwa kima yina ya ntete kele mbuma ya blé yina. Kasi, ntangu yayi, ya kele na nsungi ya Pentecote. Ntangu yayi beno lenda ve, beno, théologien nionso to . . .

⁹³ Konso muntu ya masolo, mu zola tuba, zaba ti yina kele bansungi, mutindu yawu ke kwisa. Beno baka Buku ya Apocalypse, beno baka bansungi ya dibuundu, mpe beno tala kana ya kele ve kieleka mutindu yawu ke zibuka.

⁹⁴ Ntangu yayi, kubanda Wesley me basika na ba-Pelerin de la Sainteté, ba-Nazaréen, mpe mabuundu yayi nionso ya busantu, yina ke fwanana mingi na Ndinga kulutila yina kusungika ya Luther vwandaka. Kasi, beno me mona, ntangu Luther salaka organisation, yina bandaka na kusala balutebo yina. Mpe ntangu Mpeve yayi ke mata, Mpeve bikaka dibuundu ya Luther, nionso kasi kaka denomination, mpe bakwikidi ya kieleka kwisaka na kusantisama.

⁹⁵ Mpe kuna ntangu kusantisama kwendaka, ba-Pelerin de la Sainteté, mpe nionso yina, mpe ba-organisation nionso ya busantu, ba-Nazaréen, mpe nionso yina, Yawu me katuka kuna, mbala mosi na kati ya nsungi ya Pentecote. Mpe beno tala mwa mbuma yango ntangu yayi, ya blé, ya ke talana bambala mafuku kulutila blé ya kisina, yina kwendaka na kati ya ntoto, kulutila yina mwinga vwandaka to yina putulu vwandaka. Kasi kana beno ke vwanda, beno tala yawu na nzila ya loupe, mpe beno zibula mwa mpusu yango, ya kele kaka minati diaka. Mbuma me banda ntete ve. Ya kele mwa matiti ya fyoti kaka kuna na kati, na loupe ya ngolo mingi beno lenda mona mwa nsongi yina, mutindu nsongi ya ntunga, kele kuna ke kwisaka nkuna. Mpe mpusu yayi awa ke monana kaka kieleka mutindu kima ya kieleka, ya kele ve kima ya kieleka. Ya kele kaka kivumu.

⁹⁶ Mutindu kivumu ya Marie. Marie vwandaka ve Nkuna, na kutalisa awa ya mwinga. Yandi vwandaka kaka munati ya Yawu, mutindu ndambu ya yawu. Kasi na kuvwandaka ya kubokila mpe ya kusola ntete, na nzila ya Nzambi Yandi mosi, samu na

lukanu yayi, ya monanaka mingi mutindu bankundi ya beto ya Catholique lendaka banza, ti yandi vwandaka mama ya Nzambi. Ve, yandi vwandaka mama ya Nzambi ve, yandi vwandaka Nkuna ya Nzambi ve.

⁹⁷ Kento ke salaka diki. Nzambi ke salaka luzingu. Hemoglobine, menga, kele na kati ya sexe ya bakala.

⁹⁸ Nsusu ya kento lenda losa diki to ndeke mosi lenda losa diki, na printemps ke tunga yinzo ya yandi, kasi, kana ndeke ya kento yina vwandaka ve na ndeke ya bakala, ya ke pasuka ve. Ya ke kufwa. Ya ke pola kaka na dizamba.

⁹⁹ Mutindu mu ke tubaka yawu bambala mingi, yawu yina kele dyambu na mabuundu bubu yayi, bawu ke pola kaka na dizamba, yina ba ke bokila Methodiste, Baptiste, Pentecotiste, mpe nionso yina. Kana bawu kele ve na ngwisani na Ndinga, Yawu mosi, bawu ke pola kaka kuna na dizamba, na kati ya organisation ya bawu.

¹⁰⁰ Ntangu yayi, ntangu yayi bayankaka na kati ya bawu me tuba kuna, ba-Protestant na mutindu mosi to yankaka ke kwikila ti ya vwandaka Marie yina salaka diki. Kana ya ke mutindu yina, beno tala yina beno ke sala ti Yehowa Nzambi ke sala. Diki lenda salama ve kukondwa sensation mosi.

¹⁰¹ Na yina, beno me mona, Nzambi salaka nionso zole diki mpe nkuna, Yandi vangaka nionso zole na kati ya kivumu ya Marie. Mpe Muntu yango vwandaka kima ve kasi Nzambi Yandi mosi kumaka nsuni mpe zingaka na kati-kati ya beto, Emmanuel, ve kaka muntu ya mbote, profete; Yandi vwandaka Muntu ya mbote mpe Profete; mulongisi ve, theologien. Oh, Yandi lendaka—Yandi lendaka vwanda nionso yina; Yandi vwandaka Nionso-na-Nionso. Kasi na zulu ya nionso yina, Yandi vwandaka Nzambi Yandi mosi. Biblia ke tuba, “Beto kele ya kuvuluka na nzila ya Menga ya Nzambi.” Nzambi Yandi mosi, muntu ya tatu ve to muntu ya zole. Muntu yayi, Nzambi Yandi mosi, Yehowa ya nene, fikaka Marie; mpe Mvangi, mpe vangaka nionso zole cellule ya menga, luzingu, mpe diki diaka.

¹⁰² Kana beno lenda baka Juif samu na kumona yawu, beno . . . yandi zaba Nani Mesiya kele. Ntangu John Rhyn belukaka kuna na Benton Harbor, yandi vwandaka mpofu bamvula makumi yiya. Rabbin yango yufulaka munu, yandi tubaka, mu me solola na yandi, yandi tubaka, “Beni lenda ve kuzenga Nzambi na bitini tatu mpe kupesa Yandi na Juif.”

¹⁰³ Mu tubaka, “Bayankaka na kati ya bawu ke salaka yawu. Kasi beto ke zengaka Nzambi ve na bitini tatu.” Mu tubaka, “Nge ke kwikilaka baprofete?”

“Ya kieleka, mu ke kwikilaka baprofete,” yandi tubaka.

¹⁰⁴ Mu tubaka, “Nani Ésaïe tubilaka, Ésaïe 9:6, ‘samu na beto Mwana me butuka?’”

Yandi tubaka, “Kasi, ya vwandaka Mesiya.”

105 Mu tubaka, “Wapi ngwisani ke vwanda kati-kati ya Mesiya na Nzambi?” Yina salaka yawu. Mu tubaka ntangu yayi. . .

Yandi tubaka, “Yandi ke vwanda Nzambi.”

106 Mu tubaka, “Ya kieleka kaka. ‘Nkumbu ya Yandi ke vwanda Konseye, Ntinu ya Ngemba, Nzambi ya Ngolo nionso, Tata ya Kukonda nsuka.’”

107 Ya kele kisika yina ba-unitaire me kondwa yawu, ya kele kisika yina bantu ya butatu me kondwa yawu, balweka nyonso zole ya nzila. Kasi kikati-kati kele kaka kuna na kati-kati. Kana Nzambi zolaka vwanda Tata ya Yandi Mosi, kana Yesu vwandaka Tata ya Yandi Mosi, Yandi lendaka vwanda ve. Mpe kana Yandi vwandaka na Tata yankaka na nganda ya Nzambi, mpe Biblia ke tuba ti “Mpeve-Santu” vwandaka Tata ya Yandi, mpe kana bawu kele bampeve zole ya luswaswanu, Yandi vwandaka mwana ya makangu. Ya kele kieleka. Nani vwandaka Tata ya Yandi, Nzambi to Mpeve-Santu? Beno ke tuba mosi mpe beno tala wapi mutindu beno ke vwalangana. Nzambi vwandaka Tata ya Yandi. Ya kieleka?

108 Matthieu 1:18, Yandi tubaka.

Ntangu yayi Yesu Klisto butukaka mutindu yayi: Ntangu. . .mama ya yandi Marie vwandaka fiancé na Joseph, ntete bawu kuvwanda kintwadi, yandi kuzwaka kivumu ya Mpeve-Santu.

109 Ntangu yayi Nani kele Tata ya Yandi? Beno me mona, beno me mona yina mu zola kutuba? Beno tala.

. . .Joseph bakala ya yandi, na kuvwandaka muntu ya kudedama. . .yandi zola ve kutalisa yandi nsoni na meso ya bantu, vwandaka yindula na kufwa makwela na yandi na kinsweki, mutindu yayi.

Beno tala, na yina yandi vwandaka banza na bima yayi, . . .wanzio ya Mfumu monikaka na yandi na ndosi, na kutubaka, Joseph, nge mwana ya David, kuvwanda na boma ve na kubaka na kati ya nge. . .na nge Marie kento ya nge: samu ti kivumu yina me salama na yandi kele ya . . .[Dibuundu me tuba, “. . .Mpeve-Santu.”—Mu.]

110 Mu banzaka ti bawu tubaka, “Nzambi Tata vwandaka Tata ya Yandi”? Oh, ba-théologien, wapi kisika kele lubakusu ya beno?

Beno tala, “Ya ke vwanda na Nsemo na ntangu ya nkokila!”

111 Nkuna ya kieleka basikaka na Marie, kasi ya vwandaka ve Nkuna ya yandi. Ya vwandaka nsilulu ya Nzambi, ti yandi tubaka, “Beno tala kisadi ya kento ya Mfumu.” Minati ya luzingu

vwandaka bakento. Mpe ntangu yayi, Marie, Nkuna vwandaka pene-pene mingi.

¹¹² Agar zolaka kuzwa yawu na mutindu ya kubeba. Sarah, kutula ntembe na kima yango, nataka yawu kaka na nkuna ya kimuntu, nsatu ya nzutu. Kasi Marie, kukondwa kuvukisa nzutu, kwikilaka Ndinga, mpe Ndinga kumaka nsuni.

¹¹³ Kasi beno tala, Marie vwandaka pene-pene mingi, yandi bumbaka Nkuna na kati ya kivumu ya yandi, mpe ya monanaka ti ya vwandaka Nkuna ya yandi. Mpe ya kele mutindu yina na bantu ya Pentecote. Mu ke simba mbala mosi diambu yango. Kasi beno bambuka moyo, Yesu tubaka, na Matthieu kapu 24, na nzila ya 24, “Na bilumbu ya nsuka, bampeve nyonso zole . . .” Ve na bilumbu ya nnete, ntangu yayi. “Na bantangu ya nsuka, bampeve nyonso zole ke vwanda pene-pene mingi ti ya ke vuna bayina soolamaka kana ya lendaka salama.” Mpeve ya Pentecote, kieleka kaka mutindu kima ya kieleka, na yawu ya kulunga ti ya ke vuna bayina soolamaka kana ya lendaka salama.

¹¹⁴ Ntangu yayi, yina kele ve bampova ya munu. Ya kele yina Yandi tubaka. Ntangu yayi, na manima ya mwa ntangu fioti, mu banza beno ke bakula yina mu ke meka na kutuba. Ntangu yayi Nkuna yina ya kieleka vwandaka ya kufwanana mingi . . .

¹¹⁵ Mpusu yina vwandaka ya kufwanana mingi na Nkuna, kulutula mingi na putulu, mpe kulutula mingi mwinga vwandaka, kasi ba vwandaka kaka minati ya Nkuna. Beno me mona, Luther salaka organisation, mwinga kufwaka; Wesley salaka organisation, putulu kufwaka; Pentecote salaka organisation, luzingu kufwaka. Mpe ntangu yayi Nkuna ke basika. Beno lenda kwenda ntama ve kulutula Nkuna.

¹¹⁶ Beno tala, na bamvula nyonso, ntangu kuningana ya nene ke basika, kaka na nswalu na manima ya yawu ke kwiza organisation. Pene ya bamvula tatu reveil ke zingaka, na yina bawu ke bongisa yawu, ke sala organisation. Ya fwana vwanda na mingi ya mavala; mutindu mingi basikaka na Luther, balutebo; mpe mingi basikaka na putulu, Wesley; mpe matiti ya ba-Pentecotiste ke basika, ba-unitaire, ba-binitaire, ba-trinitaire, ba-yiya, ya ba-tanu. Oh, mawa! Beno me mona?

¹¹⁷ Kasi, beno tala, bamvula makumi zole ya Yesu Klisto me monisama! Organisation mosi ve me telema, mpe mosi ve ke telema; ya ke fwa mutindu na konso mvula ya nsuka, mpe konso kima yankaka. Yayi kele ntangu ya nsuka, Nkuna, mpe ya ke kabula ve difwa na mpusu, mutindu Ismaël kabulaka ve difwa na Isaac.

¹¹⁸ Beno me mona awa ntangu yayi wapi mutindu yandi kele pene-pene, pene-pene mingi samu na kuvuna. Luther, mwinga; Wesley, felele; mpe Marie, mpusu, to kivumu, to Pentecote. Mutindu mu lenda kwenda kaka awa na zulu ya mpusu yina, mpe kulakisa beno. Na kati ya bansungi, ya me kuma pene-pene

mingi ve tii mutindu ya kele ntangu yayi. Nionso kele dibuundu, *dibuundu*, beno me mona, “yandi.”

¹¹⁹ Mpe beno tala, ya vwandaka “yandi,” na mbandukulu, yina tulaka ntembe na nsilulu ya kieleka. Ya vwandaka ve Nzambi yina katulaka Ndinga ya Yandi. Nzambi ke na kukatula ve Ndinga ya Yandi bubu yayi; Yandi ke na kusiamisa Ndinga ya Yandi ya kieleka! Kasi Sarah tubaka, “Mu banza, ya ke salama; beto ke na kuvingila.”

¹²⁰ Yawu yina diambu na bantu bubu yayi, beno ke na kumeka na kukota na kima yina beno zaba ve ti beno ke na kukota. Wapi mutindu beno ke sala yawu kana beno zaba ve yina beno ke na kusala? Beno ke na kutambulaka meso ya kufwa meso? Beno ke na kumeka na kukota na kima yina beno zaba ve yina beno ke na kusala, beno ke kubwa. “Kana mpofo ke na kutwadisa mpofo, bawu nionso zole ke kubwa na dibulu,” Yesu tubaka mutindu yina.

¹²¹ Kasi ntangu yayi beto me telama na ntangu ya Nkuna. Ntangu yayi Nkuna ke bumba, (yinki?) yina ke simbisa, ke wisana na Nkuna yina ke bumba Yawu. Ya vwandaka ya kuvwanda kuna samu na lukanu yina, samu na kubumba yawu.

¹²² Samu, mutindu mwini ke basikaka na suka-suka ya printemps, na zulu ya blé, beno tala mbote yinza ya muvimba na kati ya nsungi, na kati ya kilumbu, bima nionso ke tambula kaka na mutindu ya kulunga, na Nzambi. Ntangu yayi ntangu mwini yina ya ngolo ke banda na kusema na zulu ya nkuna, yawu ke basika. Kasi yinza fwana vwanda na kisika mosi samu na kusala ti Nkuna yina kubasika na ntoto. Ya fwana kwisa mutindu yayi, samu na kuvwanda na kisika yina ke sala ti nkuna kubasika. Ya zolaka salama mutindu yina, samu na kubasisa yawu na . . . na zulu ya nsungi ya mudidi.

¹²³ Bantu yankaka . . . muntu yayi ya masawula yina mu tubaka sonikaka buku, *Nzambi Ya Swi*, yandi tubaka, “Na kati ya bansungi nionso ya mudidi, bantu yayi ya mawa kufwaka, bawu kwendaka kuna, Baklisto, mpe Nzambi kuvwanda na Zulu mutindu kana Yandi vwandaka kwandi ve na dyambu.” Beto tala, bamputu ya muntu yina me longukaka ve, meso ya kufwa, muntu ya kimpeve, kana meso ya yandi vwandaka me zibuka kaka! Beno zaba ve nkuna fwana kulala na kati ya ntoto, samu na kufwa mpe kupola, na ntwala yawu basisa diaka kuna?

¹²⁴ Mpe dibuundu ya pantekote kufwaka, na nzila ya dibuundu ya Katolika. Mpe ya kwisaka kaka na mutindu ya mwinga, kasi beno me mona mutindu yandi ke na kuyela mpe ke kuma pene-pene mingi, na konso nsungi, na nsungi ya Luther, ya Wesley, ya Pentecote? Beno me bakula?

¹²⁵ Ntangu yayi Ya fwana vutuka mbala mosi na ministere ya kieleka yina Yandi kuzwaka awa na zulu ya ntoto, samu ti ya kele Kento ya makwela. Ba kele mosi. Ntangu yayi Yandi silaka, na

bilumbu ya nsuka, wapi mutindu bima yayi ke salama. Mpe beto ke mona yawu kusalama, mutindu bansilulu nionso, Malachie 4, Santu Luc 17:30. Oh, Masonuku yikwa diaka, ke vwanda ya kukonda nsuka!

¹²⁶ Mpe, oh, mu fwana sukisa, samu ntangu me luta. Yinga. Mbote mingi, beno—beno tuba na bawu, beno tala kana bawu lenda. . . Beno yufula bawu, beno me mona, na manima beno kwisa tuba na munu. Ntangu yayi, vingila fioti. Mu zola kuzwa yayi, yimbi mingi, beno me mona. Mu—mu zola ti beno kumona yayi, yimbi mingi. Beno tala, Yesu. . . Beno tala, beno me mona, Kento ya makwela.

¹²⁷ Kasi, beto ke mona ti, na nsungi yayi beto ke na kuzinga ntangu yayi, beno me mona, ti kivumu, organisation ya Pentecote, monanaka kaka kieleka mutindu kima ya kieleka. Kasi beno me bakula yawu, Apocalypse 17, ba me bokila yawu dibuundu ya Catholique ya Rome, organisation ya ntete, “kento ya kindumba”? Bantu yikwa zaba ti ya kele kieleka? Bantu yikwa zaba ti yandi vwandaka mama ya bakento ya kindumba? Nani kele kento ya kukondwa bumuntu? Ntangu yayi, Yandi tubaka ti kento yayi vwandaka “dibuundu.” Nani kele kento ya kindumba? Kento yina kele ya kukwikama ve na ndefi ya yandi ya makwela. Nani kele kento ya pité? Kima mutindu mosi, ndinga mosi.

¹²⁸ Ntangu yayi, yandi butaka lubutuku. Wapi mutindu ya lubutuku? Ve na Ndinga, kasi lubutuku ya organisation. Tala ba-Méthodiste, ba-Baptiste, mpe bantu ya Pentecote, mpe bawu nyonso me baka bikalulu ya mama ya bawu. Kento nionso ya kubeba na Californie lendaka buta mwana-kento ya bumwense; mpe yawu yina nsangu ya ntete basikaka, kasi ntangu kieleka talisamaka na nsungi ya Luther, ya kusantisama, yandi zolaka ve kubaka yawu. Ntangu mbotika ya Mpeve-Santu vwandaka na muswa, na talisamaka na ba-Méthodiste, bawu zolaka ve kubaka yawu. Mpe ntangu yayi ntangu Nkuna salaka pentecote, yandi lendaka ve kubaka Yawu. Yandi me sala organisation. Kasi yandi vwandaka munati ya Nkuna, beno me mona.

¹²⁹ [Mpangi-bakala mosi ke zonza na ndinga yankaka. Kisika ya mpamba na bande—Mu.] Amen. Ntangu yayi matondo na Mfumu samu na yawu, Ndinga, kukikulumusya ya Ndinga yina ba me tuba.

¹³⁰ Beno me mona, ya ke kaka ya kukikulumusya, kaka mutindu yayi, kaka mutindu beno ke tala blé kukula. Beno fwana kuzwa ve ntendulu ya nene ya théologie samu na yawu. Beno tala yawu mbote. Beno kele. . . Yandi kele kaka pene-pene ya beno, ntangu nyonso. Beno me mona, . . . ya kele. . .

¹³¹ Mu fwana kusukisa. Mu me kuwa mwa kubenda ya fyoti, mpe mu lombaka yandi na kusala yawu. Beto fwana sukisa. Ntangu

yayi, mpangi-bakala, mu ke zabisa nsamunu yayi, na manima mu ke kwenda.

¹³² Beno tala, ntangu yayi. Mpusu, mwinga, mpe nyonso yina, kele kaka minati ya Ndinga. Bawu vwandaka na kitini ya Ndinga, beno me mona, tii kuna bawu ke kubwa; kunungisama, kusantisama, kuvutuka ya makabu na—na Pentecote. Kasi ntangu yayi beno tala. Ya vwandaka kaka mutindu Ismaël, Isaac, beno me mona, mpe na manima na Yesu; beno me mona, mosi vwandaka yina ba me bebisa, mosi vwandaka ya kisina, mpe awa me kwisa Nkuna Yawu mosi. Beno me mona? Ntangu yayi, dibuundu me basika na kima mosi yina, kaka kuna na manima. Mutindu fololo to kima yankaka, ya ke kunwa, ke kota, mpe ke. . .

¹³³ Yina zola tuba ve ti bantu ya Luther me zimbana. Ba-Luthérien yina mangaka kusantisama, ya ke vwanda, yina ke zola kangama na kima mosi. . . Beno me mona, Israël kudyaka mana ya malu-malu konso nkokila, beno me mona. Beno tala.

¹³⁴ Kasi ntangu yayi na ntangu ya nsuka, beno tala mpusu yayi awa, ntangu yayi beno tala, na kati ya blé. Mansweki ya muvimba ya—ya Luzingu kele ya kukanga na kati ya mpusu yina. Beto ke mona yawu na Luther, ke kwisa. Beto ke mona yawu na kati ya felele, ke basika. Beto ke mona yawu na mwinga. Beto ke luta awa, mpe ntangu yayi ya kele na mutindu ya mpusu, kaka mutindu na nsungi ya pentecote, kasi mansweki ya kieleka me bumbama na kati.

¹³⁵ Ntangu yayi beno bambuka moyo, landila Apocalypse, mansweki nionso ya Buku kele ya kukanga na kati ya Bidimbu Sambwadi, yina basungiki kuzwaka ve siansi ya kulonga, bitini tatu ya kusungika, ba etape yiya ya Baniama yiya yina kwendaka kutana na bangolo yiya ya yinza. Ya ntete basikaka, vwandaka. . .

¹³⁶ Yinki vwandaka ya ntete yina kwendaka? Nkosi, samu na kukutana na nsungi ya Rome. Ya vwandaka Ndinga, ya kisina. Yandi kele Nkosi ya dikanda ya Juda. Klisto Yandi mosi kwendaka kutana na nsungi yina. Yinki vwandaka niama yina vwandaka landa yina vwandaka kwenda kutana; niama yina vwandaka landa yina basikaka, samu na kukutana na munati-mpunda yina vwandaka luta, yinki yandi vwandaka? Beno tala, munati-mpunda yina ya ntete vwandaka me lwata lele ya mpembe, na yimpu ya kimfumu na zulu ya yintu ya yandi, yandi vwandaka na munduki kukondwa matolo-tolo.

¹³⁷ Beno tala mpunda ya zole yina basikaka, Niama yina kwendaka kutana na yandi vwandaka ngombe. Ngombe kele niama ya munkayulu. Ba salaka bawu bambangi na nsungi ya mudidi.

¹³⁸ Niama ya tatu yina kwendaka kutana na mpunda yina ke landa, na ntwala mpunda ya lufwa kubasika, lufwa mpe difelo,

mpunda ya kulanda yina kwendaka . . . Niama yina vwandaka landa vwandaka kwenda kutana na mpunda na kilumbu yina, vwandaka Niama na kizizi ya muntu. Bantu yikwa zaba yawu? Nsungu ya mayele, basungiki, Luther, Wesley, Calvin, Knox, Finney, Moody. Beno me mona?

¹³⁹ Kasi na yina beno tala, yina kwendaka na ntangu ya nkokila? Ngononi, na lweka ya profesu dyaka. Ya ke vwanda na Nsemo na ntangu ya ngononi, nzila ya Nkembo kieleka beno ke mona, O Dibuundu ya Nzambi ya moyo!

¹⁴⁰ Mu zola kwisa awa mpe—mpe kuvwanda kaka na suka mosi, mpe kubikala kilumbu ya muvimba, kubundana na beno na bima yayi. Beno kuwa, beno banza ti mu ke zolaka beno ve? Mu zola beno, bampangi ya munu ya babakala. Mu—mu—mu ke zola kwenda na konso organisation mpe kuwi- . . . mpe—mpe kukwikila kaka na mosi na mosi. Kasi, beno me mona, ya lenda kaka ve. Ya kele na mpasi na kielo ya kuzibuka samu na munu.

¹⁴¹ Mu ke kota na kinsweki na yinsi mosi ntangu yayi, samu na organisation, samu ti bawu ke bika ve ministere yina Nzambi . . . Mu vutulaka mvutu na bawu na mukanda mosi, mu tubaka, “Bamvula kumi mu me meka na kukwisa kuna. Mpe beno na mbotika ya beno ya bulawu!”

¹⁴² Mosi ya bawu ke kwikila, “Beno fwana botama mbala tatu; mbala mosi samu na Tata, mpe mbala mosi samu na Mwana, mpe Mpeve-Santu; kizizi na ntwala.” Yankaka yina tubaka, “Ve, beno fwana kuzwa mbotika mbala tatu na manima; mbala mosi samu na Mwana, mbala mosi samu na Tata, mpe Mpeve-Santu.” Mpe bawu zole kele na foti.

¹⁴³ Mosi tubaka, “Yandi, beno me botama na lufwa ya Yandi, mpe Yandi kufwaka yintu na ntwala ntangu Yandi kufwaka. Beto me botama samu na lufwa ya Yandi.” Yankaka yina tubaka, “Nani ke zikaka muntu na kizizi ya yandi? Beno ke zikaka yandi, yintu na manima.” Buzoba ya mutindu yina, ke kabula bantu, yawu ke talisa ti yawu ke na musoki. Yawu me katuka na Satana. Yawu ke ya Nzambi ve.

¹⁴⁴ Na kati-kati ya balweka nionso zole, Nzambi kele na lweka mosi ve, kasi Yandi ke na kubokila na balweka nionso zole, “Beno basika na kati-kati ya bawu, mpe beno kabwana,” me tuba Nzambi, “mpe Mu ke yamba beno Munu mosi.”

Nzambi sakumuna beno.



NKUNA KE KABULA VE DIFWA NA MPUSU KNG65-0429B
(The Seed Shall Not Be Heir With The Shuck)

Nsangu yayi ya Mpangi William Marrion Branham, kulongamaka na Kingelesi, na Kilumbu ya yiya na suka, na kilumbu ya 29 ya Ngonda ya yiya, na mvula 1965, samu na Full Gospel Business Men's Fellowship International breakfast na Biltmore Hotel na Los Angeles, Californie, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org